

**Ukioq naallugu sapaatip akunnikkaartumik Narsarsuup Keflavik-illu akornanni amigartooruteqarsinnaanermut qulakkeerutissalimmik 1. januar 2014-imiit timmisartooqartalernissaanik Naalakkersuisut pilersitsinissamik peqquneqarnissaannik Inatsisartut aalajangiiffigisassaattut siunnersuut**

(Inatsisartuni Siumup gruppia)

**Akissuteqaat**

(Peqqissutsimut Attaveqarnermullu Naalakkersuisoq)

**Aappassaaneerpeqarnera**

Sanaartornermut Ataatsimiititaliaq aalajangiiffigisassatut siunnersuummut peqqissaartumik suliarinninneranut qutsavigissavara.

Siunnersuuteqartut ataatsimiititaliallu Kujataani angallassinermi periarfissat pitsaanerulernissaannik kissaateqarnerat Naalakkersuisut isumaqatigaat. Naalakkersuisut ataatsimiititaliap eqqarsaateqarnera ugguuna isumaqatigaat, amigartooruteqarsinnaanermut qulalarnaveeqqusiineq nunap iluani namminermi timmisartuuseriaatsinut malunnaatilimmik kinguneqassasoq.

Tamanna imatut paasineqassanngilaq, Narsarsuup Keflavikkillu akornanni ukioq naallugu attaveqarnissaq Naalakkersuisut akuersaanngikkaat – tamanna ingerlanneqartariaqassaaq niuernerpalaartumik atugassarititaasut tunngavigalugit.

Taamaattumik silaannakkut angallannermut tunngasut immikkoortumut pilersaarutisamut atatillugu Kalaallit Nunaanni timmisartuuseriaatsit, matumani ilanngullugu amigartooruteqarsinnaanermut imaluunniit suliniutit assingusut nuna tamakkerlugu timmisartorerit qanoq pitsanngoriartissinnaaneraat Naalakkersuisut misissorniarpaat. Taamaattorli aallaaviusussatut Naalakkersuisut isumaqarput, timmisartuusineq sapinngisamik annerpaamik niuernerpalaartumik atugassarititaasut tunngavilugit ingerlasariaqartoq. Immikkoortumut pilersaarummi isumaliutigineqartut ilaatigut ataatsimiititaliap Mittarfeqarfinnut pulaarnermini paasisai tunngavigalugit siunissami mittarfiit aaqqissuussaannissanissaat taamatut ilanngunneqassaaq.

Angallannermut pilersaarut eqaannersunngorteqqullugu Air Greenland Naalakkersuisut kaammattussavaat. Taamaattorli tassunga atatillugu oqaatigineqassaaq, Air Greenland arlalinnik piginnittoqarmat, siunissami ingerlatsinermut allanik kissaateqarsinnaasunik. Immikkoortuni Namminersorlutik Oqartussat Kiffartuussinissamik

isumaqatigiissuteqarfigisimasaanni, 2014-mi kiffartuussinissamik isumaqatigiissutissat ilusilersorneqalerpata ataatsimiititaliap angallannermut pilersaarutit eqaannerunissaannik ataatsimiititaliap kissaatigisaasa piviusunngortinnissaannut periarfissat Naalakkersuisut misissorniarpaat.

Kiisalu malugeqqussavara, nunap iluani namminermi timmisartuussineq ammasumik unammilleqatigiiffiummat. Qinnuteqarnissaq piunasaqaataavoq, ingerlatseqatigiiffiillu qinnuteqarnikkut, akuersissummik pinikuupput. Unammilleqatigiinnerup annerusup pilersinnissaanut atatillugu unammilligassarujussuaq tassaavoq ilaasussat ataatsimut amerlassusaat. Taamaalilluni angallaviit ikittunnguit kisimik timmisartorfigissallugit pilerinartuupput. Kisianni angallannikkut aaqqissuussineq ataqatigiissoq pilersissallugu, tassani nunap tamakkerluni naammaginartumik sullinneqarnissaa Naalakkersuisut akisussaaffigaat. Ajornartorsiutitut ilungersunartoq taanna immikkoortumut pilersaarutissami erseqqinnerusumik misissorneqassaaq.

Tamanna tunngavigalugu Naalakkersuisut tikilluaqqaat, siunnersuutip itigartinneqarnissaanut Naalakkersuisut inassuteqaataat ataatsimiititaliap isumaqatigissup tapersersormagu.